

Allanguutissatut siunnersuut

uunga

Uunga siunnersuut: Naligiissitaaneq assigiinngisitsinnginnissarlu pillugit Inatsisartut inatsisaata allangortinnissaa pillugu

Naalackersuisut aappassaaneerneqarnissamut saqqummiussaas:

§ 8-mut

1. § 8 ima oqaasertalerneqassaaq:

“ § 8. §§ 4-7 aamma § 15 apeqqutaatinnagit, inatsisinut naapertuuttumik siunertami kinaassusersiunngitsumik tunngavilersugaappat, tamatumalu naammassinissaanut aningaasassat naapertuuppata pisariaqarpatalu, Inatsisartut inatsisaat una assigiinngisitsinissamut ajoqutaanngilaq.

Imm. 2. Imm 1 suaassuseq imaluunniit immikkut inuiaassuseq tunngavigalugit toqqaannartumik assigiinngisitsinermut tunngatillugu atuutinngilaq.

Imm. 3. Inatsisartut inatsisaat una §§ 4-7 aamma § 15 apeqqutaatinnagit atorfeqarnermi oqaatsit pillugit ilaatigut piumasaqaatinik aalajangersaanissamut akornutaanngilaq.”

2. § 11 ima oqaasertalerneqassaaq:

“ § 11. Suliffeqarfik, sulisitsisup sulisitsiffigisaa, upperisamik sammisap imaluunniit upperisap aalajangersimasup siuarsarneqarnissaanik siunertaqartoq oqaatigineqarsimappat, aamma tassani sulisitap upperisamik sammisaminik aalajangiussisimanera imaluunniit upperisaa suliffeqarfimmut tassunga pingaaruteqartutut isigineqassappat, §§ 4-miit 7 ilanngullugu apeqqutaatinnagit Inatsisartut inatsisaat manna malillugu sulisitsisup sulinermik inuussutissarsiuteqartumik atorfeqarnermi atugassarititaasut ilaanni, sulisitap aalajangersimasumik upperisarsiornissaa imaluunniit upperisaqarnissaa pillugu piumasaqaateqarnissaa akornutaanngilaq.”

§ 15-mut

3. § 15, stk. 2, imatut oqaasertalerneqassaaq:

“ *Imm. 2.* Sulisitsisup sulinermik inuussutissarsiuteqartoq soraartissinnaanngilaa, taanna matumani inatsit malillugu piumasaqaammik saqqummiussaqaarsimappat, taamatullu

sulinermik inuussutissarsiuteqartuq Naligiimmik Pinninnissaq Pillugu Aalajangiisartunut naammagittaalliuteqarsimappat.”

§ 16-imut

4. § 16, imm. 1 ima oqaasertalerneqassaaq:

“ Sulinermik inuussutissarsiuteqartumik atorfinitsitsinermit atatillugu, sulisitsisup naartuneq, meerartaarnissamik pilersaaruteqarneq, qitornavissiarthaarneq, meerartaarnermit atatillugu sulinnigiffeqarneq, kinguaassutitigut sammivik, suaassutitigut kinaassutsit, suaassutsimik takutitsineq, suaassutsip qanoq ittuunera, inuiaat ilisarnaataat, ammip qalipaataa, inuiaqatigiinnut, inuttut inooqatigiinnikkullu imaluunniit inuiannut tunngasumik pilerfik, innarluuteqarneq, politikkikkut isummat, upperisaq imaluunniit aalajangersimasumik upperisaqarneq, pillugit paasissutissanik pissarsiniarsinnaanngilaq imaluunniit paasissutissanik atuisinnaanngilaq.”

5. Kapitali 6-imi qulequtaq ”Naligiissitaaneq pillugu aalajangiisartut” ”Naligiimmik Pinninnissaq Pillugu Aalajangiisartut”-mik taarserneqassaaq.

§ 21-mut

6. § 21 imatut oqaasertalerneqassaaq:

“ § 21. Nalaakkersuisut Naligiimmik Pinninnissaq Pillugu Aalajangiisartunik politikkikkut sumulluunniit attuumassuteqanngitsunik pilersitsissapput.

Naligiimmik Pinninnissaq Pillugu Aalajangiisartut tunngavissarititaasut una inatsimmi illersorneqartut pissutigalugit assigiinngisitsinermit naammagittaalliutit suliarisarpai.

Imm. 2. Naammagittaalliut suliami inatsisitigut ataasiakkaatigut maannakkut nammineq soqutigisaqartumit Naligiimmik Pinninnissaq Pillugu Aalajangiisartunut suliakkiissutaasinnaavoq.”

§ 22-mut

7. § 22, stk. 3-4, imatut oqaasertalerneqassaaq:

” *Imm. 3.* Naalakkersuisut kattuffinnit, peqatigiiffinnit, sullissivinnit il.il. inassuteqaatit malillugit Naligiimmik Pinninnissaq Pillugu Aalajangiisartunut ilaasortat toqqassavai. Inassutigineqartut suliaasaqarfinni una Inatsisartut inatsisaanni sammineqartuni ataatsimi arlalinniluunniit suliatigut uppersarsarneqartunik ilisimasaqassapput, aalajangiisartut taamaalillutik taamaattoqarsinnaatillugu tunngavinnik § 4-mi taaneqartunik tamanik ataatsimut ilisimasaqassapput.

Imm. 4. Naalakkersuisut Naligiimmik Pinninnissaq Pillugu Aalajangiisartut katitigaaneranni, suaassutsit aappaanniittut annerpaamik ilaasortamik ataatsimik amerlanerutillugit, toqqaassapput.”

§ 23-mut

8. § 23 imatut oqaasertalerneqassaaq:

” § 23. Naalackersuisut tunngavissarititaasut ataani allassimasut ilaat ataaseq arlallilluunniit naammassineqarsimappata, Naligiimmik Pinninnissaq Pillugu Aalajangiisartuni ilaasortaq tunuartissinnaavaat:

- 1) Ilaasortaq Inatsisartut inatsisaat una naapertorlugu ilaasortap suliassaannik sularinninnermini annertuumik sumiginnaappat.
- 2) Inatsisartut inatsisaat una naapertorlugu ilaasortap suliasaanik toqqissisimanartumik ilaasortap sularinninnissaanut annertuumik tatiginanngitsumik, ilaasortaq iliuuseqarpat.
- 3) Ilaasortaq tunuartinneqassasoq Naligiimmik Pinninnissaq Pillugu Aalajangiisartuni ilaasortat 3-t inassutigippassuk, aammalu Naalackersuisut pissutsinik misissuereernermi ilaasortaq tunuartinneqassasoq isumaqarpat.

Imm. 2. Naalackersuisut aalajangiisartut imatut pippata Naligiimmik Pinninnissaq Pillugu Aalajangiisartunik tunuartsisinnaapput:

- 1) arlaleriarlutik ukiumoortumik nalunaarusiunngippata,
- 2) aalajangiisartut suliassanik § 21-mi taaneqartunik suliaqanngippata.”

§ 25-mut

9. § 25, imm. 2 ima oqaasertalerneqassaaq:

“ *Imm. 2.* Suliat eqqartuussivimmi sularineqartut, aalajangiisartut sularisinnaanngilaat.”

10. § 25-mi imm. 4 nutaatut ilanngunneqassaaq:

“ *Imm. 4.* Naammagittaalliut, sulisitsisut sulisartullu akornanni inatsisilerinermik aqqissuussani malittarisassat malillugit, aamma manna inatsimmi malittarisassat malillugit sularineqarsinnaappat taarsiiffigitinneq aamma soraarsitsineq pillugit, tak. §§ 50-53, sulisitsisut sulisartullu akornanni inatsisilerinermik aqqissuussani taakkunani sularineqarsinnaanera isumaqatigiisummut ilaasut isumaqatigiissutigisinnaavaat.”

§ 26-mut

11. § 26 imatut oqaasertalerneqassaaq:

” § 26. Naligiimmik Pinninnissaq Pillugu Aalajangiisartut suliassaminnut naapertuuttumik suleriaasissartik namminneerlutik aalajangersassavaat.”

§ 27-mut

12. § 27 imatut oqaasertalerneqassaaq:

” § 27. Naligiimmik Pinninnissaq Pillugu Aalajangiisartunut ilaasortat, Inatsisartunut Naalackersuisunut il.il. ilaasortat akissarsiaat pillugit Inatsisartut Inatsisaanni kapitel 7-imi malittarisassat naapertorlugit, akissarsiaqassapput. Aningaasartuutit taakku aalajangiisartunut Nunatta Karsianit ukiumoortumik tapiissutit iluanni akilerneqassapput.”

§ 28-mut

13. § 28, Imm. 1, imatut oqaasertalerneqassaaq:

” Atuisartoqarnermut Unammilleqatigiinnermullu Aqutsisoqarfik Naligiimmik Pinninnissaq Pillugu Aalajangiisartunut allattoqarfeqartitsissaaq.”

§ 30-imut

14. § 30, imm. 2 ima oqaasertalerneqassaaq:

“ *Imm. 2.* Naammagittaalliuutit aalajangiisartunit suliarineqarnissaat naleqquttuunngitsutut nalilerneqartut, allattoqarfiup itigartissinnaavai. Naammagittaalliuuteqarsinnaatitaasup aalajangiinerup aalajangiisartunut saqqummiunneqarnissaa allattoqarfimmut noqqaassutigisinnaavaa. § 28, imm. 2-mi aamma § 29-imi aamma § 32-imi aalajangersakkat taamatuttaaq atorneqassapput.”

§ 38-imut

15. § 38, imm. 4, nr. 5 ima oqaasertalerneqassaaq:

“5) Suliffeqarnermi naligiimmik aningaasarsiaqarnissaaq aammalu suaassutsikkut assigiinngisitsinermi ajornartorsiuteqarfiusut sulissutigissavai.”

§ 43-mut

16. § 43, imm. 7 ima oqaasertalerneqassaaq:

“ *Imm. 7.* Kattuffiit, peqatigiiffiit aamma sullissiviit sorliit, siunnersuisoqatigiinnut ilaasortassanik innersuussisinnaasut, aamma ataatsimiigiaqqusinermi aamma innersuussuussutinik nalunaaruteqarnerni ingerlatseriaatsit pillugit malittarisassanik erseqqinnerusunik Naalackersuisut aalajangersaasinnaapput.”

§ 44-imut

17. § 44, imm. 2 ima oqaasertalerneqassaaq:

“ *Imm. 2.* Naligiissitaanermut Siunnersuisoqatigiinni ilaasortanik Naalakkersuisut aamma soraarsitsisinnaapput, siunnersuisoqatigiit:

1) ukiumoortumik nalunaarusianik naatsorsuutinillu Naalakkersuisunut tunniussinngippata, imaluunniit

2) suliassanik, § 38, imm. 2-mi aamma 3-mi taaneqartunik suliaqanngippata.”

§ 47-mut

18. § 47 ima oqaasertalerneqassaaq:

“ **§ 47.** Inatsisartuni Naalakkersuisunilu il.il. ilaasortat aningaasarsiaqartitaanerat il.il. pillugit Inatsisartut inatsisaanni kapitali 7-imi malittarisassat malillugit Naligiissitaanermut Siunnersuisoqatigiinni ilaasortat aningaasarsianik il.il. tiguisassapput. Aningaasartuutit taakku Nunatta Karsianit siunnersuisoqatigiit ukiumoortumik tapiissutisiaannit akilerneqartassapput.”

§ 49-mut

19. § 49, imm. 2 ima oqaasertalerneqassaaq:

“ *Imm. 2.* Ukiumut naatsorsuutit inernerit kukkunersiukkat ukiut tamaasa kingusinnerpaamik 1. september Naalakkersuisunut tunniunneqartassapput.”

§ 55-imut

20. § 55 ima oqaasertalerneqassaaq:

“ **§ 55.** § 20-imik unioqqutitsineq Kalaallit Nunaanni pinerluttulerinermi inatsit malillugu pineqaatissinneqarnermik kinguneqarsinnaavoq.

Imm. 2. Ingerlatseqatigiiffiit il.il. (inatsisitigut pisinnaatitaasut pisussaataitaasullu) Kalaallit Nunaanni pinerluttulerinermi inatsimmi kapitali 5-imi malittarisassat malillugit pinerluttulerineq pillugu inatsiseqartitsineq malillugu akisussaatinneqarsinnaapput.

Imm. 3. Imm. 1-imiit 2 ilanngullugu akiliisitsissutit aalajangerneqartut, Nunatta Karsiata pissavai.”

§ 56-imut

21. § 56, imm. 1 ima oqaasertalerneqassaaq:

“ Inatsisartut inatsisaat ulloq 1. juli 2024 atuutilissaaq.”

22. § 56, imm. 4 ima oqaasertalerneqassaaq:

“ *Imm. 4.* Inatsisartut inatsisaat malillugu Naligiissitaanermut Siunnersuisoqatigiit nutaat, ulloq 1. januar 2025 sulilertussat, toqqarneqassapput. Angutit arnallu naligiissitaanissaat pillugu Inatsisartut inatsisaat nr. 3, 29. november 2013-imeersoq malillugu

Naligiissitaanermut Siunnersuisoqatigiit kingusinnerpaamik toqqarneqartut, Naligiissitaanermut Siunnersuisoqatigiit nutaat sulilernissaasa tungaannut, Naligiissitaaneq assigiinngisitsinnginnissarlu pillugit Inatsisartut inatsisaat manna malillugu sulissapput.”

Allannguutissatut siunnersuummut oqaaseqaatit

Nassuiaatit nalinginnaasut

Siunnersuummi, taarsiiffigitinneq aamma soraarsitsineq pillugit sulisitsisut sulisartullu akornanni inatsisilerinermik aaqqissuussani suliasat, inatsisissatut siunnersuummi § 25-mi, aamma sulisitsisut sulisartullu akornanni inatsisilerinermik aaqqissuussami malittarisassaniittuni katersornissaat periarfissanngortinneqarpoq.

Suliaq pisariinnerulersinniarlugu isumaqatigiissummi ilaasut (sulisitsisut aamma sulisartut kattuffii) sulisitsisut sulisartullu akornanni inatsisilerinermik aaqqissuussani malittarisassat, aamma manna inatsimmi §§ 50-53 malillugit taarsiiffigitinnerit il.il. pillugit sulisitsisut sulisartullu akornanni inatsisilerinermik aaqqissuussat aalajangiisarnissaat isumaqatigiissutigisinnaanerit siunertarineqarpoq.

Aaqqissuussaq kajumissutsimik tunngaveqarpoq. Taamaammat suliamut tunngatillugu isumaqatigiissummi ilaasut sulisitsisut sulisartullu akornanni inatsisilerinermik aaqqissuussaq tunngavigalugu suliarineqassanersoq isumaqatigiissinnaanngippata, sulisitsisut sulisartullu akornanni inatsisilerinermik aaqqissuussaq aamma manna inatsit ataatsikkut tunngavigalugit suliarineqarsinnaassaaq.

Tamatuma saniatigut inatsisinut periutsit atorlugit iluarsinerit tulluarsarlugit ilanngunneqarput, soorlu aamma inatsit UKA2023-imi naammassillugu suliarineqanngimmat, ulloq atuutilerfissaq allanngortinneqartoq. Tamatuma kingunerisaanik nutaamik Naligiissitaanermut Siunnersuisoqatigiinnik toqqaanissamut piffissaliussaq aammattaaq allanngortinneqarpoq.

Allannguutissatut siunnersuutip aningaasaqarnikkut kingunerisassai

Allannguutissatut siunnersuut aningaasaqarnikkut kingunerisassanik maanna naatsorsuummut sunniuteqassanngitsoq naatsorsuutigineqarpoq.

Allannguutissatut siunnersuummi aalajangersakkanut ataasiakkaanut nassuiaatit

Nr. 1-imut (siunnersuummi § 8)

Imm. 1-imut

Assigiinngisitsineq aalajangersagaq manna malillugu inatsimmik atuutsitsilissaaq, taanna tunngavissalimmik siunertaqarnermi kinaassusersiunngitsumik tunngavilersugaappat aammalu tamatuma naammassinissaanut aningaasassat naapertuuppata pisariaqarpatalu. Aalajangersakkami assigiinngisitsinerup inatsimmik naammassinninnissaanut, piumasaqaatit annertusiartortut tamarmik naammassineqartussat pingasut, aalajangersakkami aalajangersarneqarput. Taamaalilluni tassani pineqarpoq ataasiakkaatigut nalilersuinissaaq, ataasiakkaat assigiinngisitsinnginnissamut illersorneqarnissamik soqutigisaqarnerat pisariaqartitsinerallu, assigiinngisitsinermut tunngavilersuutaasumut sanilliullugu oqimaaqatigiissaarneqassalluni.

Inatsimmik naammassinnittumik siunertaqarnek sullivimmi assersuutigalugu tassaasinnaavoq eqqiluisaarnissamut isumannaallisaanermullu piumasaqaat imaluunniit ilisarnartuunissaaq pillugu piumasaqaat, tassani assigiinngisitsinissamut tunngavissalimmik naleqquttumillu tunngavilersuutissaqarluni.

§ 4 apeqqutaatinnagu, soraarnerussutisialinnut imaluunniit innarluuteqarnermut ikiorserneqarnissamut, isumaginninnermi isumannaallisaatinut inuussutissarsiornermut attuumassutilinnut ilaatinneqartumut, periarfissaqarnermut imaluunniit pisinnaatitaateqarnermut ukiunut killiliussanik aalajangersaanissamut, imaluunniit aaqqissuussinerit taakkua killissaasa iluanni naatsorsuinerni ukiunut tunngavissarititaasunik peqqissuserlu pillugit paasissutissanik atuinissamut, inatsit manna akornusiinngilaq.

Imm. 2-imut

Suiaassuseq imaluunniit immikkut inuiaassuseq tunngavigalugit toqqaannartumik assigiinngisitsinermut tunngatillugu imm. 1 atuutinngilaq.

Imm. 3-imut

§ 4 apeqqutaatinnagu, oqaatsinut piumasaqaatinik aalajangersimasunik aalajangersaanissamut inatsit manna akornusiinngilaq, assersuutigalugu atorfinitsitsinerit ilaanni, tassani atorfik pineqartoq suliffigisinnaassagaanni qinnuteqartup kalaallisut oqalussinnaanissaa tunngavilersorneqarpat aamma naleqquttuuppat.

Nr. 2-imut (siunnersuummi § 11)

Aalajangersakkap taamaallaat suliffeqarfinnut atuutinnginnera, kisiannili aamma sullissivinnut il.il. atorfinitsitaanermi atugassarisanut atuunera, inatsisip oqaasertaasa allanngortinneqarneranni erseqqissaassutigineqarpoq.

Nr. 3-imut (siunnersuummi § 15, imm. 2)

Aalajangersakkami kalaallisoortani ”Naligiimmik Pinninnissaq Pillugu Aalajangiisartut” eqqunngitsumik nutserneqarsimavoq. Kukkuneq taanna allannguutissatut siunnersuummi iluarsineqarpoq.

Nr. 4-imut (siunnersuummi § 16, imm. 1)

Atorfinitsitsinermut atatillugu paasissutissanik pissarsiniarnissamut inerteqquteqarnermi utoqqaassuseq pillugu paasissutissat ilaatinneqannginnerat allannguutissatut siunnersuutip kinguneraa, tassami assersuutigalugu meeqqanik pinerliisimannginnermut uppersaammik pissarsinermi, paasissutissat taakku pissarsiarinissat pisariaqartussaammat, soorlu aamma inuussutissarsiutit ilaanni sulisup 18-inik ukioqalereersimanissaa piunasaqaataasoq.

Nr. 5-imut (siunnersuummi kapitali 6-ip qulequtaa)

Qulequtami kalaallisoortani ”Naligiimmik Pinninnissaq Pillugu Aalajangiisartut” eqqunngitsumik nutserneqarsimavoq. Kukkuneq taanna allannguutissatut siunnersuummi iluarsineqarpoq.

Nr. 6-imut (siunnersuummi § 21)

Aalajangersakkami kalaallisoortani ”Naligiimmik Pinninnissaq Pillugu Aalajangiisartut” eqqunngitsumik nutserneqarsimavoq. Kukkuneq taanna allannguutissatut siunnersuummi iluarsineqarpoq.

Aalajangersakkami imm. 2-mi pineqarpoq inatsisilioriaatsikkut allannguut, aalajangersakkap inississorneranut tunngasoq aamma Aalajangersakkami kalaallisoortani ”Naligiimmik Pinninnissaq Pillugu Aalajangiisartunik” eqqunngitsumik nutserneqarsimanera. Aalajangersakkamut nassuiaatit sinneri suli taamatut atuutissapput.

Nr. 7-imut (siunnersuummi § 22, imm. 3 aamma 4)

Aalajangersakkami kalaallisoortani ”Naligiimmik Pinninnissaq Pillugu Aalajangiisartunut” eqqunngitsumik nutserneqarsimavoq. Kukkuneq taanna allannguutissatut siunnersuummi iluarsineqarpoq.

Nr. 8-imut (siunnersuummi § 23)

Aalajangersakkami kalaallisoortani ”Naligiimmik Pinninnissaq Pillugu Aalajangiisartuni” aamma ”Naligiimmik Pinninnissaq Pillugu Aalajangiisartunik” eqqunngitsumik nutserneqarsimapput. Kukkuneq taanna allannguutissatut siunnersuummi iluarsineqarpoq.

Nr. 9-imut (siunnersuummi § 25, imm. 2)

Oqaatsitigut allannguneq allannguutip taamaallaat kinguneraa, aamma aalajangersakkamut oqaaseqaatinik attuumassuteqartunik aaqiisoqarnissaata siunertarineqarnera kinguneralugu.

Naligiimmik Pinninnissaq Pillugu Aalajangiisartut, suliamik eqqartuussivinni ingerlasumik suliaqarsinnaannginnerat, aalajangersakkap kinguneraa.

Nr. 10-imut (siunnersuummi § 25, imm. 4)

§ 25, imm. 4-imi aalajangersagaq nutaajuvoq. Aalajangersakkap imm. 4-ani siunnersuutaavoq, isumaqatigiisummi ilaasut manna inatsit §§ 50-53-iani taarsiiffigitinnernut soraarsitaanernullu suliaqarnerni, suliaq manna inatsimmi malittarisassanut, aamma sulisitsisut sulisartullu akornanni inatsisilerinermik aaqqissuussat malittarisassaanut tunngappat, sulisitsisut sulisartullu akornanni inatsisilerinermik aaqqissuussiffinnut inissinneqarsinnaasoq.

Tamanna isumaqarpoq, inatsit manna tunngavigalugu taarsiisoqarnissaanik, taarsiisoqassappallu annertussusissaanik, kiisalu soraarsitsinerup qanoq isumagineqarnissaanik sulisitsisut sulisartullu akornanni inatsisilerinermik aaqqissuussat aalajangiisinnaassasut. Erseqqissaatigineqassaaq inuttut atorfinitsitaanermi atugassarisanut kisimi tunngasuuneri, taamaalillutillu ilersuisooqataasunut il.il. tunngasuunatik.

Isumaqatigiisummi ilaasut pineqartillugit, ilaasut isumaqatigiissut malillugu sulisitsisumik aamma sulisartumik sinniisuusut, imaluunniit sinniisuusinnaasut pineqarput.

Nr. 11-imut (siunnersuummi § 26)

Aalajangersakkami kalaallisoortani ”Naligiimmik Pinninnissaq Pillugu Aalajangiisartut” eqqunngitsumik nutserneqarsimavoq. Kukkuneq taanna allannguutissatut siunnersuummi iluarsineqarpoq.

Nr. 12-imut (siunnersuummi § 27)

Aalajangersakkami kalaallisoortani ”Naligiimmik Pinninnissaq Pillugu Aalajangiisartunut” eqqunngitsumik nutserneqarsimavoq. Kukkuneq taanna allannguutissatut siunnersuummi iluarsineqarpoq.

Nr. 13-imut (siunnersuummi § 28, imm. 1)

Aalajangersakkami kalaallisoortani ”Naligiimmik Pinninnissaq Pillugu Aalajangiisartunut” eqqunngitsumik nutserneqarsimavoq. Kukkuneq taanna allannguutissatut siunnersuummi iluarsineqarpoq. Naligiimmik Pinninnissaq Pillugu Aalajangiisartunut Atuisartoqarnermut Unammilleqatigiinnermullu Aqutsisoqarfik allatseqarfimmik ikiutissasoq tamatuma saniatigut aalajangerneqarpoq.

Nr. 14-imut (siunnersuummi § 30, imm. 2)

Suliarinninnginnissaq pillugu allatseqarfiup aalajangiinera, Naligiimmik Pinninnissaq pillugu aalajangiisartunut naammagittaalliuuteqarsinnaatitaasup saqqummiussimappagu, § 28, imm. 2-mi, § 26-imi aamma § 32-imi aalajangersakkat atorneqassasut, siunnersuutip kinguneraa.

Nr. 15-imut (siunnersuummi § 38)

Oqaatsitigut aaqqiineq siunnersuutip kinguneraa.

Nr. 16-imut (siunnersuummi § 43, imm. 7)

Oqaatsitigut aaqqiineq siunnersuutip kinguneraa, taamaalillutik Naligiissitaanermut Siunnersuisoqatigiinnut kattuffiit, peqatigiiffiit aamma sullissiviit sorliit ilaasortassanik innersuussisinnaasut, aamma ataatsimiigiqqusinermi aamma innersuussuussutunik nalunaaruteqarnerni ingerlatseriaatsit pillugit malittarisassanik erseqqinnerusunik Naalakkersuisut aalajangersaasinnaalerput.

Nr. 17-imut (siunnersuummi § 44, imm. 2)

Siunnersuisoqatigiit ukiumoortumik nalunaarusianik naatsorsuutinillu Naalakkersuisunut tunniussinngippata, imaluunniit suliassanik, § 38, imm. 2-mi aamma 3-mi taaneqartunik suliaqanngippata, Naligiissitaanermut Siunnersuisoqatigiinni ilaasortanik Naalakkersuisut soraarsitsisinnaasut, siunnertuutip aammattaq aalajangersarpaa.

Oqaatsitigut aaqqiineq aamma tekniskiusumik inissiinerit isikkuisa allanngortinneqarnerat siunnersuutip aammattaq kinguneraa.

Nr. 18-imut (siunnersuummi § 47)

Oqaatsitigut aaqqiineq siunnersuutip kinguneraa.

Nr. 19-imut (siunnersuummi § 49)

Inatsisinut periutsit atorlugit oqaatsitigut aaqqiineq siunnersuutip kinguneraa, taamaalilluni ukiumoortumik naatsorsuutit kukkunersiorneqarsimasut ukiut tamaasa kingusinnerpaamik 1. september Naalakkersuisunut tunniunneqartassapput.

Nr. 20-imut (siunnersuummi § 55)

Oqaatsitigut aaqqiineq siunnersuutip kinguneraa, tamatumuuna taaguut nuannarisaasoq “pinerluttulerinermi inatsit” innersuussutigiginagu “Kalaallit Nunaanni pinerluttulerinermi inatsimmut” innersuussisoqarpoq”.

Aammattaaq aalajangersagaq nutaaq (imm. 3) ilanngunneqarpoq, tassani akileeqqusissutit Nunatta Karsiata pisassagai erseqqissaassutigineqarpoq.

Nr. 21-imut (siunnersuummi § 56, imm. 1)

Ullup atuutilerfiussap ullormut 1. juli 2024-imut allanngortinneqarnissaa siunnersuutip siunertaraa.

Nr. 22-imut (siunnersuummi § 56, imm. 4)

Ullup atuutilerfiussap allanngortinneqarnerata kingunerisaanik Naligiissitaanermut Siunnersuisoqatigiit nutaat toqqarneqarnissaannut ulloritinneqartup allanngortinneqarnissaa siunnersuutip siunertaraa. Siusinnerusukkut inatsit, inatsisip massuma atuutilersinneqarneratigut atorunnaarsinneqartussa, malillugu Naligiissitaanermut Siunnersuisoqatigiit toqqarneqarsimasut, Naligiissitaanermut Siunnersuisoqatigiinnik nutaanik toqqaasoqarnissaata tungaanut inatsimmi nutaami aalajangersakkat malillugit atuutissasut, tamatuma peqatigisaanik aalajangersarneqarpoq.